

固安縣志卷之七上

人物志

十室之內必有忠信固邑爲古方城地志稱敦禮義
尙廉恥韓集稱多慷慨悲歌之士是賢豪當輩出而
舊邑所列晉梁間僅有張氏一門意古屬幽州涿郡
則史載幽涿人未必無方城固安人歟不可攷已有
明以來彬彬林立達則經文緯武窮則勵行潛修忠
孝節廉之性百折不回事久論定直道在人洵不可
沒也志人物

卷之七

七

名宦

晉

張華字茂先方城人父平魏漁陽郡守華性至孝少孤貧自牧羊同郡盧欽見而器之鄉人劉放亦奇其才以女妻焉華學業優博辭藻溫麗卽瞻多通圖緯方技之書莫不詳覽少自修謹造次必以禮度勇於赴義篤於周急器識宏曠時人罕能測之初未知名著鵠鵲賦以自寄陳留阮籍見之歎曰王佐才也由是聲名始著郡守鮮于嗣薦爲太常博士盧欽言於晉文帝除佐著作郎遷長史兼中書郎朝議表奏多見施用武帝受禪拜黃

門侍御封關內侯後數載拜中書令加散騎常侍遭母
憂哀毀過禮中詔免厲逼令攝事初帝與羊祐潛謀伐
吳羣臣以爲不可惟華贊成其計及將大舉以華爲度
支尙書乃量計運漕決定朝算吳平進封廣武縣侯儀
禮憲章多所損益詔誥皆所草定聲譽益盛有台輔之
望焉迨間言旣行乃出華爲持節都督幽州諸軍事領
護烏桓校尉安北將軍撫納新舊中外懷之於是遠人
賓服四境無虞頻歲豐稔士馬強盛惠帝以華爲太子
少傅拜右光祿大夫開府儀同三司侍中中書監金章
紫綬固辭開府華盡忠匡輔彌縫闕當闇主虐后之

朝而海內晏然華之力也久之論前後忠勲進封壯武
郡公華十餘讓中詔敦辟乃受數年爲司空領著作帝
出太子手書示羣臣莫有敢言者惟華曰此國之大禍
自漢武以來每廢黜正嫡恒至喪亂且國家有天下日
淺願陛下詳之華少子韙以中台星折勸華遜位華不
從曰天道元遠惟修德以應之爾不如靜以待之以俟
天命趙王倫孫秀將廢賈后詐稱詔召華華將死謂張
林曰卿欲害忠臣耶又曰臣先帝老臣中心如丹臣不
愛死懼王室之難禍不可測也遂害之朝野莫不悲痛
時年六十九華性好人物誘進不倦窮賤之士有一介

之善者便咨嗟稱誅爲之延譽雅愛書籍身死之日家
無餘財惟有文史溢於機篋嘗徙居載書三十簞天下
奇秘世所希有者悉在華所由是博物洽聞四海之內
若指諸掌時人比之子產太安詔復侍中中書監司空
公廣武侯遣使弔祭之華著博物志十篇及文章並行
於世今祀於鄉賢祠

梁

張宏策字真簡方城人安之子梁文獻皇后從父弟也幼
以孝聞母嘗疾五日不食宏策亦不食母強爲之進粥
策乃食母所餘遭母憂三年不食鹽菜幾至滅性友愛

兄弟嘗同臥起世比之姜肱兄弟與梁武帝年相輩幼見親狎建武末從武帝宿酒酣徙席星下詔及時事卽請定君臣之分後從武帝西行表爲錄事參軍帶襄陽會義師將起以宏策爲輔國將軍郢城平帝乘勝直指建業宏策與帝意合凡磯浦村落軍行宿次立頓處所宏策預爲圖皆在目中城平遣宏策清宮封檢庫庫申勒部曲秋毫無犯封洮陽縣侯宏策盡忠奉上知無不爲交友故舊隨才薦拔縉紳皆趨焉後孫文明等作亂入衛尉府盜害之年四十七贈散騎常侍車騎將軍謚曰愍宏策爲人寬厚通率篤故舊及居隆位不以貴地

自高故人賓客禮接如布衣時祿賜皆散之親友及遇
害莫不痛惜今祀鄉賢

唐

張知憲字匪躬幽州方城人徙家岐兄弟五人知元知晦
知泰知默皆明經高第曉吏治清介有守公卿爭爲引
重調露時知憲監察御史裏行歷十一州刺史所蒞有
威嚴武后降璽書存問又門皆列戟白鶴巢其庭后數
寵賜中宗在房州后禁察苛嚴知憲爲州刺史供饘保
戴不少弛帝復位拜左衛將軍加雲麾將軍封范陽郡
公伯仲華首同貴時以爲榮知憲歷東都副留守左右

羽林大將軍同華州刺史大理卿致仕年八十開元時
卒知蹇敏且亮惡請謁求進士或不才冒位視之若仇
每敕子孫經不明不得舉家法可稱云

明

王復字初陽沙堡屯人騏子天性寬厚沉靜寡言三歲喪
母及長事繼母以孝聞劉知縣敬見其氣宇磊落而莊
重有威博學彊記而不樂遊戲知他日必爲經濟之器
深愛重之補弟子員教諭陳遜憫其純篤寒苦惓惓有
成就之意平日人未見其誦讀而於聖賢旨趣性理蘊
奧悉研窮默識爲文冲淡善於講解同列謂之王訓詁

督學侍御每試必稱賞不已正統辛酉舉鄉書明年登
第甲子授刑科給事中乙巳陞通政使司左叅議景泰
初也先擁英宗入關邀大臣迎駕復奮然欲往遂充禮
部右侍郎爲正使齋捧勅書以行至德勝門外得仰瞻
御容頓首拜泣也先怒令左右持刃迫脅仍以數事詰
責復反覆辨論不屈英宗止之曰休與他辨將紙筆來
寫啟與太后知道也先實意送朕來卽着大臣出迎復
等奏稱倉卒出城未將紙筆英宗笑曰好秀才官連紙
筆也無口傳去罷遂同也先遣騎馳追欲加害復等已
入城矣遂陞右通政景泰癸酉持節冊封瀋王妃資子

一無所受甲戌轉左通政累陞兵部左侍郎尙書調工部特進榮祿大夫柱國太子少保以疾卒贈太子太保謚莊簡廕二子一孫入監讀書崇祀鄉賢祠

楊維聰字達甫和子正德辛巳廷試一甲第一授翰林院修撰遷右春坊右中允因議大禮廷杖出爲山西副使累遷太僕寺卿崇祀鄉賢祠

傅好禮字伯恭馬慶里人萬厯甲戌進士陝西涇陽知縣擢御史請節游宴停內操裁戚畹語皆切直接浙江歲大祲動帑銀二萬兩留漕糴二萬石賑之自陳擅發罪上特宥之厯陞太常寺少卿時推使四出海內騷動好

禮抗疏言假官抽稅之害四日不報復具疏跪闕下三日神宗震怒降廣昌典史卒於官既而上思好禮言下其疏誅民張禮等二十八人害乃除天啓中贈太常寺少卿崇祀鄉賢祠

仕蹟

宋

張穆之梁太祖文獻皇后父也字思靜晉司空華六世孫
輿乃其曾祖也少方雅有識鑒宋元嘉中爲員外散騎
侍郎深被始興王濬引納穆之鑒其禍萌求爲交趾太
守治有異績會刺史死交土大亂穆之威懷循拊境內
以安宋文帝嘉焉將以爲交州太守會病卒梁武帝時
追贈光祿大夫加金章紫綬子宏籍無子以從父弟宏
策子續爲嗣

梁

張緇字元長宏策子也年數歲外祖中山劉仲德異之嘗
曰此兒非常器不止爲張氏寶方爲海內令名也齊永
元末義師起父從武帝向西留緇襄陽年始十歲每聞
軍有勝負憂喜形諸顏色及梁天監元年其父爲盜所
害緇痛父死之酷喪過於禮武帝每遣喻之服闋襲封
洮陽縣侯召補國子生起家必書郎出爲淮南太守時
年十八帝疑其年少未嫻吏事乃遣主書封取郡曹文
案見其斷決允愜甚稱賞之還除太子舍人雲麾外兵
參軍緇少勤學自課讀書手不輟卷尤明後漢及晉代
衆家客有執卷質緇者隨問便對略無遺言徐勉舉緇

充殿中郎出爲武陵太守還拜太子洗馬中舍人累遷
北中郎諮議參軍甯德長史復遷豫章內史緬爲政任
恩惠不設鉤鉅人民化其德亦不敢欺故老咸云數十
年未有踰者徵爲左長史以疾不拜改爲太子中庶子
領上林監俄遷御史中丞以事左降黃門郎兼領元職
緬居憲司推繩無所顧望號爲勁直武帝常遣畫工圖
其形於臺省以勵當官遷侍中未任卒時年四十二詔
贈侍中加貞威將軍侯郡公緬性至孝爲武陵太守時
母劉氏不欲隨緬入官府緬在郡所得祿俸不敢用乃
至妻子不易衣裳及還都並以供母賑贍親屬雖累朝

所蓄一朝隨盡私室常聞然如貧素者與弟續館俱博
學昭明太子與續書有賢兄學業該通遇事明敏雖倚
相之讀墳典邨穀之敦詩書推今望古蔑以斯過等語
緬性愛墳籍聚書至萬餘卷鈔後漢紀四十卷晉鈔三
十卷又鈔齊梁書未及成文集五卷

張續字伯緒緬第三弟也嗣從伯宏籍後宏籍武帝舅也
續年十一尙武帝第四女富陽公主拜駙馬都尉封利
亭侯召補國子生起家秘書郎時年十七身長七尺四
寸眉目疎朗神彩煥發武帝異之嘗曰張壯武云後八
世有逮興者其此子乎續好學兄緬有書萬餘卷晝夜

披閱殆不輟手續爲秘書郎固求不徙欲遍觀閣內書籍數載方遷太子舍人轉洗馬中舍人魏使彭城人劉善明請求識續續時年二十三善明見而嗟服累遷太尉諮議參軍尚書吏部郎俄爲長史兼侍中時人以爲早達出爲甯遠華容公北中郎長史南蘭陵太守加貞威將軍行府州事三年入爲度支尚書出爲吳興太守續治郡省煩苛矜清靜民吏便之徵爲吏部尚書後門寒素有一介者皆見引拔不爲貴要屈意人士翕然稱之但負其才氣無所與讓武帝手詔曰續外氏英華朝中領袖司空以後名冠范陽可尚書僕射續在職與議